

# FORUM – GIMNASI CLAUSTRAL

## Alla tscherca da fastitgs dil 20avel tschentaner a Minca



**Las scolaras ed ils scolars dalla sisavla classa dil gimnasi durant lur viseta dil  
\*Olympiapark\* a Minca (foto med)**

La davosa fin d'jamna prolungida (23-2 – 26-2) havein nus, 18 scolars e scolaras dalla sisavla classa dil gimnasi claustral da Mustér cun nos scolasts da historia, astgau passentar a Minca.

Quei viadi havein nus fatg per approfondar differents eveniments dil 20avel tschentaner e vistar loghens impurtonts che nus havevan gia tractau durant las lecziuns dil rom complementar da historia en scola.

### **\*Olympiapark e Weisse Rose\***

Il venderdis essan nus arrivai suenter in viadi da pressapauc tschun uras cun tren a Minca. Suenter che nus havein saviu deponer nossas bagaschas en nies albiert essan nus semess sin via el marcau. Nossa emprema destinaziun ei stada igl Olympiapark. Ella tschunavla classa havevan nus tematisau la relaziun denter la domena dil sport e quella dalla politica. Egl Olympiapark havein nus saviu profundar quella savida cugl exempel concret digl attentat digl onn 1972 a Minca. Lu haveva ina gruppaziun terroristica palestinesa priu atlets israelians en ostagi durant l'olimpiada.

La sonda avonmiezdi havein nus fatg ina catscha da zenzlas [= Schnitzeljagd] el center dil marcau da Minca en gruppas. Aschia havein nus viu il marcau ed empriu d'enconscher novs loghens historics. Il suentermiezdi havein nus giu ina guida ella Ludwig-Maximilians-Universität. Hans e Sophie Scholl ein stai students en quell'universitad duront la Secunda Uiera mundiala. Duront l'instrucziun en scola havevan nus gia empriu dabia davart lur resistenza encunter il naziunalsocialissem. Ils dus fargliuns Scholl s'udevan tier la gruppa renomada Weisse Rose.

### **Impressiunont ed emoziunal**

Il motiv principal per noss'excursiun ei denton stau da visitar in camp da concentraziun dils naziunalsocialists. In tal havein nus visitau la dumengia, numnadamein a Dachau. Buca lunsch ordvart Minca havein nus astgau entrar en quei camp. In guid ha menau nus atras las staziuns impurtontas e ha dau vinavon a nus nundetg bia da sia savida. Igl ei stau fetg impressiunont, denton era enorm emoziunal.

Il gliendisdis avon che turnar a casa havein nus aunc astgau visitar in davos liug impurtont a Minca. Nus essan stai sin viseta tier Dr. Renke Deckarm ella representanza regionala dalla Cumissiun europeica a Minca. El ha raquintau a nus da siu mintgadi e silsunter havein nus era discutau cun el davart temas politics en connex culla Uniun europeica.

L'excursiun a Minca ei stada fetg impressiunonta. Nus havein buca mo astgau veser bia loghens ed instituziuns impurtontas, mobein havein era giu in bi temps da cumpignia. Las seras eis ei vegniu tschenau ensemen, dau giugs e ris. Era duront il viadi cun tren havein nus giu cuorturala grazia a giugs e legras paterladas.

**per la classa da matura, Eliane Cathomen ed Elena Candinas**